

道光遵義府志

義府志卷四十

年紀二

宋

太祖乾德三年秋七月珍州刺史田景遷內附

係志

按宋史西南溪峒諸蠻傳唐季之亂蠻酋分據其地自署刺史卽謂此等而高州蠻傳又云賜名珍州明統志亦云給賜珍州郡名蓋因獻地卽以自署者予之也

開寶元年珍州刺史田景遷言本州連歲災沴乞改爲高州從之

宋史

按元豐九域志西高州夜郎郡領夜郎麗高榮
德樂源四縣在夔州路省廢州軍中卽此高州
明統志亦作西高州云景遷上言自給賜珍州
郡名以來連遭火災乞改州名太祖從之改爲
西高州並鑄五溪都防禦使印以賜之

太宗太平興國三年八月辛未夷州蠻任朗政來貢

按明統志云夜郎縣唐置屬珍州改屬溱州宋
乾德中廢之熙寧中復置宣和間廢之故址在
播州宣慰司北五十五里亦不知何據姑附此

真宗咸平三年高州蠻來貢

四年及景德三年大
中祥符六年並來貢

五年秋七月癸丑詔許高州蠻田彥伊子承寶等入

朝賜器帛冠帶並宋史紀

二年二當高州刺史田彥伊子承寶等百二十二

人來朝賜巾服器幣以承寶為山河使九溪十洞

撫諭都監貴州通志

按桐梓邱志云宋太平間置夜郎縣屬珍州殊

無據

景德元年高州五姓義軍指揮使田文部來貢

三年高州新附蠻酋八十九人來貢並貴州通志

仁宗慶曆八年以黔州羈縻南溱二州隸渝州宋史

按元豐九域志夔州路羈縻州漆州漆溪郡領榮懿扶歡二縣右隸渝州

神宗熙寧六年五月癸卯朔播州楊貴遷遣子光震來貢以光震爲三班奉職

八年十一月熊本擊渝州獠平之置南平軍

渝州南川獠木斗叛詔本安撫之本進營銅佛垵

木斗舉秦州

按當作漆州

地五百里來歸爲四砦九堡

建銅佛垵爲南平軍召本還知制誥

續通鑑綱目

十一月丙戌渝州改南平軍

宋史紀事本末

渝州蠻者唐南平獠也其地西南接烏蠻昆明哥

蠻大小播州部族數十居之治平中熟夷李光吉
梁秀等三族據其地各有眾數千家以威勢脅誘
漢戶有不從者屠之沒入土田往往投充客戶謂
之納身稅賦皆里胥代償藏匿亡命數以其徒僞
爲生獠劫邊民官兵追捕輒遁去習以爲常密賂
黠民覘守令動靜稍築城堡繕器甲遠近患之熙
寧三年轉運使孫固判官張詵使兵馬使馮儀弁
簡杜安行圖之以禍福開諭因進兵復賓化砦平
蕩三族以其地賦民凡得租三萬五千石絲綿一
萬六千兩以賓化砦爲隆化縣隸涪州建榮懿扶

歡兩砦其外銅佛垣者隸渝州南川縣地皆膏腴
自光吉等平他部族據有之朝廷因補其土人王
進才充巡檢委之控扼進才死部族無所統數出
盜邊朝廷命熊本討之建爲南平軍以渝州南川
涪州隆化隸焉貴州通志
涪州熙寧七年招收唐涪州置樂懿寨屬南平軍
崇寧中復立涪州

南平軍熙寧八年招收西南蕃部以恭州南川縣
銅佛垣地置軍隆化縣八年自涪州來隸南川縣
皇祐五年置縣隸恭州熙寧八年來隸尋廢爲鎮

隸隆化縣元豐元年復

並宋朝事實軍條同惟西南

宋志西南蕃作西番

同下州南平軍熙寧七年招收西南蕃部以渝州

南川縣銅佛地置軍治南川縣縣二熙寧七年以

涪州隆化縣隸軍仍省渝州南川縣爲鎮入焉元

豐元年復置南川縣南川九鄉榮懿開邊通安安

穩歸正五砦濠川一堡有松山得勝山七渡水隆

化軍東百四十五里七鄉七渡水一寨有永陵山

羅緣山熨溪胡陽溪

元豐九域志

按史志言置軍七年八年渝州恭州參互不一

七年蓋言收蕃部之時八年乃置軍之時固不

相妨渝州至崇寧元年始改恭州則作渝者爲是宋朝事實謂七年置榮懿寨宋志漆溪砦下亦云本羈縻溱州領榮懿扶歡二縣熙寧七年招納置榮懿等砦隸恭州後隸南平軍二者七年七字皆是三字之譌何以明之通志渝州蠻條與宋史渝州蠻傳同其書建榮懿扶歡兩砦並卽在三年孫固平蕩三族之時宋志所謂隸恭州應卽此時其後熊本討王進才部建南平軍始移以隸之志所謂後隸南平軍也二書蓋誤以隸南平年爲置砦年耳通鑑輯覽注銅佛

垣在南川縣南其地有金銅佛像二相傳爲唐明皇所鑄濠州唐置宋爲羈縻州後改爲榮縣等砦地在今重慶府綦江縣南接貴州遵義府界

元豐四年南平酋長楊光震助官軍破瀘夷乞弟殺

其黨阿訛

訛孫志

哲宗紹聖四年三月丁卯詔瀘南安撫司南平軍毋

擅誘楊光榮獻納播州疆土

宋史紀

是歲播州夷楊光榮等內附

孫志

徽宗大觀元年涪州夷駱世華駱文貴內附

二年六月乙酉以涪夷地為珍州

並宋史紀

珍州唐貞觀末開山洞置唐末沒於夷大觀二年

大駱解上下族帥獻其地復建為珍州

宋史志

高州蠻故夜郎也在涪州西南宋初其酋田仙

即

遷以地內附賜名珍州拜為刺史仙以郡多火災

請易今名大觀二年有駱解上下族納土復以珍

名州云

同高州蠻傳

珍州大觀二年大駱解上下族帥駱世華駱文貴

等獻地東西四百五里南北三百五十一里以其

地為珍州亦曰樂源郡復立樂源縣為州治焉珍

州本唐珍州後屬高州樂源縣本唐珍州屬縣朱

龔恭孫字德孺以蔭補通判施州崇寧中部蠻向
文疆叛詔轉運使王遵領州事致討恭孫說降文
疆而斬之遵上其功進三秩知涪州遂以開邊爲
已任誘珍州駱文貴承州駱世華納土費不貲轉
運判官朱師古劾恭孫生事詔黜師古而以恭孫
代於是漆播溪思費等州相繼降每開一城輒褒
遷五年間至徽猷閣待制威州守乞通保霸二州
進恭孫直學士知成都府委以招納未幾其酋董

舜咨董彥博來納土詔遣赴闕皆拜承宣使賜第
京師更名保州祺州霸州亨州使恭孫進築之言
者論其貪縱究治如章謫保靖軍節度副使才踰
月起知陳州復待制帥瀘州又以築思州進學士
前後在西南二十年所得州縣多張名簿實瘡鹵
不毛地繕治轉餉爲蜀人病無幾時皆廢

宋史龐籍傳

籍單州武城人恭孫籍孫

按邵經邦宏簡錄於徽宗是年六月書瀘南夷
任應舉納土建爲珍州渝州蠻趙秦等內附建
爲溱州攷應舉史云沿夷其納土所建是承州

非珍州且二人納土史皆有年無月邵氏誤也

惟趙秦史作趙秦未知孰是又史龐籍傳言承

州駱世華恐亦誤當以紀志及宋朝事實為準

是歲涪夷任應舉

按此間當楊文貴內附宋史

木攀首領趙秦播州夷族楊光榮各以地內屬詔建

漆播二州

同上

播州樂源郡大觀二年南平夷人楊文貴

按當作光榮

等獻其地建爲州領播川琅川帶水三縣

漆溪砦本羈縻漆州領榮懿扶歡二縣熙寧七年

招納置榮懿等砦隸恭州後隸南平軍大觀二年

別置涪州及涪溪夜郎兩縣

並宋史志

按建播州地乃楊光榮所獻宋朝事實言之甚詳觀與史渝州蠻傳合志云文貴未審耳孫志云三年楊文貴納土以其地置遵義軍於白綿堡領播川琅川帶水三縣白綿乃置播州地三縣亦播州所領非軍地軍領志誤合之也元豐九域志省廢州軍夔州路有播州播川都領遵義帶水芙蓉三縣其時並珍涪夷皆未復特舉唐制爲言耳續通鑑綱目云渝州蠻內附以其地爲涪州渝州蓋其總名木攀乃其析稱

三年春正月丁卯以涪夷地爲承州

宋史

承州本羈縻夷州大觀三年酋長獻其地建爲承

州領綏陽都上義泉寧夷洋川五縣

宋史

承州大觀二年蘇平帥任漢崇獻地東西三百五

十九里南北六百六十五里改爲承州

原州地

領綏陽都上洋川寧夷等縣皇朝收復但據夷人

所指以置縣然原其始析置移屬則都上近黔州

寧夷近思州

宋史

按宋朝事實云任漢崇獻地宋史前年紀云任

應舉內附亦猶珍州之駱有世華文貴同一事

也續通鑑綱目書涪州夷內附以其地爲珍承
州在大觀元年十二月當緣龐恭孫傳合併書
之當以本紀爲得元豐九域志省廢州軍夔州
路有夷州義泉郡領五縣與宋志同

二月丙子朔播州楊文貴納土以其地置遵義軍宋史

紀

遵義軍大觀二年播州楊文貴獻其地建遵義軍
及遵義縣宋史

遵義軍大觀二年蕃帥楊文貴獻地東西百二十
里南北六百一十二里以其地置軍唐貞觀元宋史

九年析牂柯置遵義按牂牁郡作縣屬朗州十一

年州廢縣亦省十三年復立播州亦復置縣十四

年更名羅蒙十六年更名遵義後自播州徙州治

唐袁播州爲楊氏兩族所分據一居播州一居遵

義以江水爲界其後居播州者曰光榮得唐所給

州銅牌居遵義者曰文貴得州銅印大觀二年兩

族各獻地皆自以爲播州議者以光榮爲族帥重

違其意乃以播州立州遵義立軍宋朗

按續通鑑綱目大觀三年春二月南平夷內附

以其地爲遵義軍及播州言軍州一時置與李

攸說合蓋得之

六月甲戌以瀘夷地爲純滋二州

宋史紀

南廣蠻在敘州慶符縣以西大觀三年有夷酋羅永順楊光榮李世恭等各以地內屬詔建滋純祥

三州後皆廢

宋史敘州路蠻傳

大觀二年建純州置九支安溪兩縣及美利城宣和二年廢純州及九支縣爲九支城以安溪美利城爲砦慈竹砦爲堡

大觀三年建滋州置承流仁懷兩縣宣和三年廢州爲武都城以仁懷爲堡承流縣併入仁懷

宋史志

川府

按置珍承溱播等州及遵義軍史志係年不一
今以紀爲主通鑑輯覽云大觀元年十二月涪
州夷內附以其地爲珍承州知涪州龐恭孫誘
之也旣而恭孫奏渝州南平夷內附置溱播州
及遵義軍尋又奏瀘州夷納土置純滋州每開
一城恭孫輒得褒遷恭孫在西南二十年所得
州縣多張名簿實瘠鹵不毛地繕治轉餉爲蜀
人病未幾皆廢珍州唐置後沒於蠻宋復建地
在今貴州遵義府桐梓縣承州宋置今遵義府

綏陽縣是遵義軍今爲府屬貴州滋州宣和中
廢爲武都城在今遵義府仁懷縣純州在今瀘
州

政和三年夏四月庚寅以復漆播等州降德音於梓
夔路

五月壬寅以築漆播進執政官一等

宣和二年廢漆州及縣以漆溪砦爲名隸南平軍
三年播州廢爲城隸南平軍廢遵義縣以遵義砦爲
名隸珍州廢承州以綏陽縣隸珍州縣二樂源綏陽

按孫志云宣和六年廢播州爲縣隸南平軍桐梓志亦云六年廢播州爲播川縣隸南平軍蓋本明統志而統志但云宣和中不云六年又宋志於夔州路下書北宋所領州軍有珍南平無承播遵義乃指省廢後爲說

高宗紹興元年秋七月珍州守臣李玠棄城去宋史紀

孝宗淳熙三年遷播川縣於穆家川卽今地孫志

十年南平旱

寧宗開禧三年冬十月乙卯復珍州遵義軍宋史紀

按宋志播州注云中有遵義砦開禧三年升軍

嘉定五年秋九月庚戌遵義砦按當夷楊煥來獻馬

宋史紀

十一年復遵義軍爲砦宋史志注

按孫志理宗端平二年廢遵義軍爲播川寨隸

珍州當卽嘉定十一年事

理宗端平三年復以白綿堡爲播州三縣仍廢宋史志

嘉熙二年遵義始有進士

先是設科取士未及播楊价請於朝而歲貢士三

人至是再從周中周坦榜進士孫志

三年復設播州充安撫使宋史志

置播州沿邊安撫司屬夔路隸四川制置司孫志

播州始建孔子廟

安撫使楊文畱心文治建孔子廟以勵國民民從

其化潛溪集

按建廟據晉濟橋碑及潛溪集無年月而潛溪
集言楊价卒嘉熙中故係於此其建處卽今府
城東府學左之文昌宮明統志云官慰司學以
舊鄉學基建孫志云學廢見爲梓潼宮陳志同
明統志祠廟云文昌祠宋建蓋宋建爲學而明
復建至中葉廢始爲祠須互勘乃得之

淳祐四年詔以播州人冉璉權知合州璉弟璞通判

州事

孫志

余玠進龍圖閣四川安撫制置使知重慶府兼四川總領夔路轉運使大更弊政遴選守宰築招賢館於府之左供張一如帥所下令當如諸葛集眾思廣忠益欲有謀以告我者近則徑詣公府遠則自言於郡所在以禮遣之高爵重賞朝廷不吝以報有功豪傑之士趨期立事今其時矣士之至者玠不厭禮接咸得其歡心言有可用隨其才任之苟不可用亦厚遺以謝時播州冉氏兄璉弟璞自

言有文武才隱居蠻中前後辟召皆不應及是聞
玠賢相謂曰是可與語者詣府上謁玠素聞其名
引入分廷抗禮賓館之奉安之若素有居數月無
所言玠爲設宴酒酣坐客紛然競言所長璉兄弟
飲食而已玠以微言挑之卒默然玠曰是觀我所
以待之何如耳明日闊別館以處且使人窺其所
爲兄弟終日不言惟對踞以堊畫地爲山川城郭
之形起卽漫去如是又旬日請見屏人語曰某兄
弟尋明公禮遇思以少裨非敢同眾人也爲西蜀
計其在徙合州城乎玠不覺躍起執其手曰此玠

志也但未得其所耳曰蜀口形勝之地莫若釣魚山請徙諸此若任得其人積粟守之賢於十萬師遠矣巴蜀不足守也玠大喜曰玠固疑先生非淺士今豈敢掠美歸已當聞於朝請不次官之詔進玠端明殿學士除璉承事郎權發遣合州璞承務郎權通判州事徙城之務悉以委之命下一府皆噓以爲不可玠怒曰城成則蜀賴以安不成玠獨坐之無預諸君卒築青居大獲釣魚雲頂天生凡十餘城皆以山爲壘晷布星分爲諸郡治所屯兵聚糧爲必守計諸城如臂使指氣勢連絡

宏簡

夏五月丁巳武功大夫雄威軍都統制楊价世守南
邊連年調戍播州捍禦勤瘁詔价轉右武大夫文州

刺史

宋史紀

寶祐二年秋七月己酉詔以播州連年捍禦其守臣

楊文子官一轉餘推恩

宋志

四年五月甲辰羅氏鬼國遣報思播言元兵屯大理
國取道西南將大入邊詔以銀萬兩使思播結約羅

鬼爲援

宋史紀

按續宏簡錄大理傳云先是蒙古兵出靈關羅
施鬼國卽遣使報思播言蒙古有事大理寶欲

取道西南大人中國當預爲之備思播守者聞
諸朝宋廷臣皆言蒙古生長朔方恃馬騎爲用
隆冬草枯盛夏出便當反北若踰番詔必須
多歷時月滇黔之間岡嶺欹折策馬奔馳料不
得遲縱使安據南詔方行東向須得交廣以窺
吳楚是謂仰攻地利不便爲此慮者非迂則誣
及大理已入蒙古假道幹腹遂其始謀乃出烏
蒙趨瀘江過馬湖通道嘉定重慶直抵合州濟
蜀江然後順流東下一軍歷邕桂至潭州一軍
由廣南至衡州太弟忽必烈自北發師由汝南

入大勝關渡江圍鄂州與羅鬼先見之言符合而宋室遂不可支馴至滅亡方下詔責已勉諸道進兵亦何益哉

五年閏四月巳酉田應寅乞屯瀘淑以援思播

宏簡錄

六年春正月甲戌詔樞密院編修官呂逢年詣蜀闕

趣辦關隘屯柵糧相度黃平思播諸處險要緩急事

宜具工役以聞

孫志

四月丁酉詔田應巳思州駐劄御前忠勝軍副都統

制往播州共築關隘防禦

宋史紀

按孫志云六年夏詔田應庚以思明都統往播

州築關隘防禦邊圉與史不合

秋七月乙亥呂文德入播州詔荆湖給銀萬兩

孫志

十一月甲寅築黃平賜名鎮遠州呂逢年進一秩詔

撫禦沿邊將士

宋史紀

開慶元年春正月癸丑詔呂文德城黃平深入蠻地

撫輯有方與官三轉

孫志

夏四月丁丑以向士壁爲湖北安撫副使知峽州兼
歸峽施珍南平軍紹慶府鎮撫使六月丙戌南平來
報戰功

秋七月癸亥以知播州楊文知思州田應庚守禦勤

勞詔各官一轉

並宋史紀

是歲春元將紐璘犯思播二州獲將一人

按紐璘事據元史本傳云戊午之明年春云云敘在中統前考中統前已未當理宗開慶元年

咸淳末以珍州屬播州縣一樂源

宋史志

按宋志夔州路下書南渡後所領州軍有播無珍有南平無遵義蓋據省廢後爲說

瀛國公德祐元年四月癸亥加知思州田景賢知播州楊邦憲並復州團練使趣兵入衛

九月辛未加田景賢福州觀察使楊邦憲利州觀察

使

並宋史紀

端宗景炎二年春元軍入重慶府張珩死之播思等
州皆降於元

孫志

元

世祖十二年十二月己亥僉書四川行樞密院事皆
順言紹慶府施州南平及諸蠻曰告馬蒙阿永等有
向化之心又播州安撫楊邦憲思州安撫田景賢未
知順逆乞降詔使之自新並許世紹封爵從之

十四年三月庚戌僉書東西川行樞密院事皆順言
比遣同知隆州事趙孟煇賚詔招諭南平軍降田楊

一家家鵝夷民亦各遣使納款

冬十月甲申播州安撫使楊邦憲言本族自唐至宋世守此土將五百年昨奉旨許令仍舊乞降璽書從之

十五年十一月丁亥以辰沅靖鎮遠等郡與蠻獠接壤民不安業命塔海程鵬飛並爲荆湖北道宣慰使置司常德路餘官屬畱荆南府供給糧食軍需

十二月庚辰思州安撫使田景賢播州安撫使楊邦憲請歸宋舊借鎮遠黃平二城仍撤戍卒不允景賢等請降詔禁戍卒毋擾思播之民從之

並元史紀

丙申從播州安撫楊邦憲請以鼎山仍隸播州

十六年春正月改播州鼎山縣爲播川縣

並孫志

按鼎山縣宋史不載止有播川孫志二條同元紀乃云改鼎山爲播川意宋末已有改置而史遺之也

二月甲辰命田楊二家貴官子充質子入侍

六月丁丑朔詔諭四川行中書省四道宣慰司撫治播川婺川西南諸蠻夷官吏軍民各從其俗無失常業

至元十七年三月甲辰思播州軍侵鎮遠黃平界命

李德輝往視之

並元史紀

是年西南夷羅施鬼國既降復叛詔雲南湖廣四
川合兵三萬人討之兵且壓境德輝適被命在播
乃遣安珪馳駟止三道兵勿進復遣張孝惠諭鬼
國趣降其酋阿察熟德輝名曰是活台州李公耶
其言明信可恃卽身至播州泣且告曰吾屬百萬
人微公來死且不降今得所歸蔑有二矣德輝以
其言上聞乃改鬼國爲順元路以其酋爲宣撫使
元史李德輝傳其後有譖德輝受蠻馬千首帝曰是人朕
所素知雖一羊不妄受寧有是耶不聽德輝受降

還至黃平夜星竇如斗歎曰他日嘗夢主烏江今播水名烏江適遇是星竇吾死徵也吾嘗羨馬伏波老當益壯奇曹武惠爲將不殺今所活者多馬革裹尸歸何憾病七日卒播民廟祀之

續宏簡錄並貴州通志

十二月己卯羅氏鬼國土寇爲患思播道路不通發

兵千人與洞蠻開道

貴州通志

十八年三月己亥救黃平隸安西行省鎮遠隸潭州

行省各遣兵戍守

元史

閏八月丁巳命播州每歲親貢方物

十九年二月壬子詔令亦奚不薛及播思敘三州軍

征緬國並孫志

二十一年三月辛亥敕思播管軍民官自今勿遷元紀

夏四月戊申敕發思播田楊二家軍二千從征緬孫志

閏五月巳卯以思播二州隸順元路宣撫司

二十三年六月辛酉封楊邦憲妻田氏爲永安郡夫

人領播州安撫司事元史紀

二十四年播州宣撫賽因不花即楊漢英等赴闕請畱順

元宣慰速哥孫志

二十六年十一月丙辰改播州爲播南路元史紀

按孫志書改播南路於二十四年誤

二十七年二月播州安撫使楊漢英進雨氊干續宏簡錄

二十八年六月辛巳洞蠻鎮遠立黃平府元史紀

二十九年春正月丙辰播州洞蠻因籍戶懷疑竄匿

降詔招集之韓姪以行播州軍民安撫使楊漢英爲

紹慶珍州南平等處沿邊宣慰使行播州軍民宣撫

使播州等處管軍萬戶仍佩虎符孫志

三月巳酉命奚不薛與思播州同隸湖廣省元史紀

庚戌賜速哥幹羅思賽因不花蠻夷之長五十六人

金紋綾絹各七十九匹及弓矢鞍轡貴州通志元

三十年夏四月甲寅幹羅思請以八番見戶合思播之民兼管徙宣慰司治長沅靖州常賦外歲輸鈔三

千錠不允

同上

五月命思播黃平等處拘刷亡宋避役手號軍人以

增鎮守

孫志

十二月乙未遣使督思播二州及鎮遠黃平發宋舊

軍八千人從征安南

元史紀

按歐陽元許熙載神道碑云在衡安仁盜袁舜一怨苦播州餉負險挺亂既誅朝廷宥其餘黨甚眾云云以本碑考之熙載年將授室欲就學

東南因爲當道知辟德慶路提控案牘由是以
本職歷永衡兩路是熙載提控衡路必在三十
歲後熙載以中統二年生至至元末三十三四
歲則苦餉當卽發宋舊軍征安南事也

成宗大德元年十二月壬寅朝洞蠻內附立長官司
二命楊漢英領之

閏十二月乙卯平伐等蠻未附播州宣撫使楊漢英
請以已力討之

並元紀

十二月播州宣撫司楊漢英請以已力討平伐等
未附蠻仍命湖廣省管刺罕便宜收撫

貴州通志
師旅考

按孫志大德元年詔播州安撫楊漢英討黃平等蠻黃平當是平伐之誤非兩事也貴州通志土司門又書漢英請討平伐未附蠻在元貞二年十一月亦誤

五年右丞劉深征八百媳婦遁出播

孫志

是年宋隆濟及折節叛詔湖廣行省平章劉二拔都

卽劉國傑

指揮使也先忽都魯率兵偕賽因不花

覲討之

六年九月師出播州境

旣史

五年五月雲南土官宋隆濟叛水西土官之妻蛇節以其眾應之十一月遣劉國傑及也先忽都魯

將兵征隆濟六年十一月國傑裨將宋光大敗蛇
節七年四月國傑師出播州境大破蛇節於墨特
川庚辰蛇節降丁亥誅蛇節八年正月雲南順元
同知宣撫事宋阿重生禽其叔隆濟來獻贛州志
按元史楊寶因不花傳言六年九月師出播境
通志云七年四月國傑師出播境通志蓋以成
宗紀書蛇節降在七年四月傳合言之當以傳
爲得

七年十二月戊子以平宋隆濟功增諸將秩賜銀鈔
等物有差其軍士各賜鈔十錠放歸存恤一年丁未

以轉輸軍餉勞免思播二州稅糧一年

元史紀

武宗至大三年正月詔西帶蠻人寇調思播土兵討

捕

通志

三年春正月辛丑樞密院臣言湖廣省詔西帶蠻
阿馬等連結萬人入寇已遣萬戶移刺四奴領兵
千人及調思播土兵併力討捕臣等議事勢緩急
地理要害四奴備知乞聽其便宜調遣

紀本

四年正月辛丑立詔西府以土官阿馬知府事佩金符

仁宗紀

仁宗皇慶二年二月丁亥以詔西府隸播州宣撫司

元史紀

延祐四年黃平南蠻盧薛叛新部黎魯亦嘯劫聚亂
詔楊漢英宣撫之二賊降置戍而還集

按史傳言盧崩蠻叛在至大四年續宏簡錄傳
又云大德八年皆誤有考證語在土官門播州
注中

五年冬十月己丑播州南寧長官洛麼作亂思州守
臣換住哥招諭之洛麼遣人以方物來覲貴州志
七年十二月丁未播州蠻的羊籠等來降

按蠻蠻降事孫志書在五年誤通志與史同

英宗至治元年秋七月黃平府蠻盧碎爲寇削萬戶
何之祺等官一級

按盧碎疑卽潛溪集之韓史傳之崩字異音實
同

三年二月癸酉罷播州黃平府長官所一徙其民隸
黃平

泰定帝二年秋七月丙辰播州蠻黎平愛等集羣夷
爲寇湖廣行省請兵討之不許詔播州宣撫使楊也
里不花即楊招諭之

冬十月癸巳播州凱黎苗率諸寨苗獠爲寇

並元史紀

按孫志泰定帝元年播黎平愛等同凱黎苗夷爲寇詔宣撫楊燕里不花招撫之卽上二事而年與史異也里燕里燕禮延禮延里皆一人

三年春正月丙午朔播州宣慰使楊燕里不花招諭

蠻酋黎平愛

旣作慶通志亦然後文改

等來降

六月癸未播州蠻黎平愛復叛合謝烏窮爲寇宣撫使楊燕禮不花招平愛出降烏窮不附命湖廣行省討之

十一月辛酉播州蠻宋王保來降

四年秋七月甲辰播州蠻謝烏窮來獻方物

九月甲寅湖廣土官宋王保來獻方物

十一月辛卯以降蠻謝烏窮爲蠻夷官

並元史紀及通志

文宗天歷二年四川囊加台攻播州苗兒堽宣慰使

楊延里不花開關迎之因遣諸王月魯帖木兒等至

播招諭楊延里

魯二字元作魯今改

不花及其弟皆降

孫志

二年春正月丁丑四川囊加台攻破播州猶兒堽

臨宣慰使楊延禮不花開關納之王午播州楊萬

戶引四川賊兵至烏江峰官軍敗之八番元帥脫

出亦破烏江北岍賊兵復奪關口諸王月魯帖木

兒統蒙古漢人答刺罕諸軍及民丁五萬五千俱

至烏江二月丙午囊加台分兵逼襄陽湖廣行省
調兵鎮播州及歸州癸丑諸王月魯帖木兒等至
播州招諭土官之從囊加台者楊延里不花及其
弟等皆來降四月湖廣行省參知政事孛羅奉詔
至四川赦囊加台等蜀地悉平諸省兵皆罷八月
台以指斥乘輿坐大不道
奔市 本紀貴州通志

六月順元思播州諸驛因兵興馬多羸驛戶貧乏
令有司市馬補之

按孫志三年秋命有司市馬補播諸驛年時與

史異

至順元年三月甲寅乖西解蠻三千人入松梨山燒沿邊官軍營堡

五月甲戌八番乖西解苗阿馬察伯秩等萬人侵擾邊境詔樞臣分兵討之

並元史紀及通志

順帝至正十二年六月乙丑紹慶宣慰使楊延禮不花遙授湖廣左丞楊伯顏卜花爲紹慶宣慰使換文資楊城爲沿邊溪洞招討使兼征行萬戶回賜先所拘收牌面

二十三年僞夏明玉珍以竇英爲參政鎮播州改珍州思寧等處長官司司珍爲真

孫志

按元史本紀二十二年五月明玉珍據成都自稱蜀王二十三年春正月朔明玉珍僭稱皇帝建國號曰大夏紀元曰天統楊璟諭明昇檄曰定下疆場南不過播州自是至明洪武四年播並屬明氏

明玉珍於播州地增置餘慶州割南平綦江長官司爲綦江縣

至元間改播州爲播州沿邊安撫司黃平等十一長官司屬焉隸湖廣行省明玉珍僭據增餘慶州割南平綦江長官司爲綦江縣

孫志

按元史地理志載播州軍民安撫司所屬府一
等處十九不稱等處者十二其分置年月自黃
平府外悉不可考孫志云十一長官意元中葉
卽有省併至明初歸附又止有二安撫六長官
則又省併矣今於元志播州屬府等處名略考
附土官卷末此則略焉

明

太祖洪武元年詔播州宣慰楊鑑

按明史明史稿皆作楊鑑通鑑輯覽

明一統志率精兵二萬爲征虜將軍傅友德先鋒

四年將軍傅友德破僞夏真州鄭瑄以軍從

並孫志

按通鑑綱目三編通鑑輯覽書以傅友德爲征虜將軍討明昇並在洪武四年正月不應元年卽詔鑑率兵爲先鋒孫志元字誤考明史亦載勅鏗率兵二萬從大軍南征爲先鋒在十四年或卽一事而史年爲確

尋改播州沿邊宣撫司爲宣慰司

孫志

按明史及明史稿書仍置播州在五年正月二志書承四年因明統志考二史載平蜀遣使諭播州亦在四年

五年正月播州宣慰使楊鏗同知羅琛總管何嬰蠻

夷總管鄭珣等相率來歸朝貢方物納元所授金牌銀印銅章詔勅賜鏗衣幣仍置播州宣慰使司鑑琛皆仍舊職改總管爲長官司以嬰等爲長官司長官

王鴻緒明史稿播州傳

五年播州宣慰使楊鏗來朝始置宣慰司令仍舊

職蠻司合誌

六年升播州宣慰司爲宣慰使司領草堂黃平安撫司二播州餘慶白泥容山真州重安長官司六孫陳志

按明史及史稿於鏗等歸附卽書仍置宣慰使不言升者略之也當以二志爲詳二志據明統

志及四川舊省志其言所領亦如二史總係於前非謂當時長官安撫已定置如此也

置播州諸驛

七年中書省奏播州土地既入版圖當收其貢賦自洪武四年始歲納糧二千五百石爲軍儲帝以其率先來歸田賦隨所入不必額徵之

九月置播州黃平宣撫司

十二月播州安渡蠻黃安亂貴州衛指揮張岱討平

之

並明史稿

八年五月鏗遣其弟錡來朝賜衣幣自是每三歲入

貢不絕

明史稿

是年於黃平地置重安長官司

明統志

按明史稿永樂四年設重安長官司隸播州宣慰司以張佛保爲長官以佛保曾招輯重安蠻民向化故也與明統志乖異當是洪武時已置司至永樂時特以佛保爲長官史稿誤併爲一時耳

九年改播州軍民都鎮撫司爲播州長官司

明統志

十三年十一月遣景川侯曹震往四川永寧開通河道調撥大小官軍悉聽節制十四年二月震到成都分遣官屬各任其責實播驛鋪橋道委播州宣慰司

楊鏗重慶千戶鎮洪■提調軍民開之自二月初七

日興工五月十五日工歇至秋九月初一日興工次

年正月十五日工畢凡八閱月

曹震開承
寧河記

十四年命使賁勅符諭鏗比聞爾聽浮言生疑貳今

大軍南征多用戰騎宜率兵二萬馬三千爲先鋒庶

表爾誠

明史稿

十五年改播州宣慰司隸貴州改黃平衛爲千戶所

明史

十七年改舊州草塘等處長官司爲草塘安撫司改
真州思寧等處長官司爲真州長官司復白泥州爲

白泥長官司明統志鏗子震以疾卒於京命有司歸柩

明史稿

二十年十月徵鏗入朝貢馬十四帝諭以守土保身

之道賜鈔五百錠

二十一年播州宣慰使司並所屬宣撫司三字當作安撫長

官各遣其子來朝請入太學帝為勅國子監官善訓

導之並明史稿

置重慶府播州宣慰司茶倉

二十二年命諸將防西年夷以延安侯唐勝宗駐播

之黃平並孫志

三十三年建播州長官司學

明統志

成祖永樂四年免播州荒田租

明史稿

升播州長官司學爲宣慰使司學

明統志

六年播州宣慰楊升併融貢馬賜賚有差

孫志

七年宣慰使楊升招諭草塘黃平及重安所轄當科

葛雍等二寨蠻人來歸

明史稿

按貴州通志云是年楊升請勦尙科諸寨不許

九年楊升入朝賀萬壽貢馬

十年楊升遣兄亮貢馬俱賞賚之

並孫志

宣宗宣德三年升賀萬壽節後期行在禮部議子半

賞帝以道遠勿奪其賜

七年草塘所屬穀撒等四十一寨蠻長官常徒等作亂聚眾二千餘人將攻牛場乾溪等堡事聞勅總兵陳懷勦之未幾懷招之復業

並明史稿

按蠻司合誌草塘穀撒等寨蠻長作亂攻牛場乾谿等堡勸撫之不從遂勦平之與史稿小異

英宗正統四年革播州茶倉

孫志

景帝景泰三年輝奏

正統十四年宣慰使楊綱老疾以其子輝代

湖貴所

轄臻剖五岔等苗賊糾合草塘江渡諸苗黃龍章保等殺掠人民屢撫屢叛乞調勦以靖民患帝命總督

王來總兵梁瑄等會同四川巡撫勦之

七年調輝兵征銅鼓五開叛苗賜勅諭頒賞

並明史稿

憲宗成化十年十一月以播州賊齊巢累歲爲患命宣慰楊輝子愛襲父職

播州賊齊巢等累歲爲患勅責川貴鎮巡官將人貢巡撫以播地連諸蠻輝專守土難離遠帝命雷輝十一月命輝子愛襲父職舊制土官襲職必三司先按實奏請而後許正統末苗蠻聚眾寇邊輝父綱不任職特命輝越制就襲至是土官同知羅宏奏輝有疾乞以愛代帝命愛襲職仍勅愛卽率

兵從總官勦賊先是輝奏所屬天壩干地五十三寨及重安所轄灣溪等寨屢被蠻苗占據乞令湖貴會兵征之命如輝言部議以愛年幼請仍起輝暫理軍事又以輝難獨任宜勅都御史張瓚親至播州督理厲輝等振揚威武以備征調其機宜悉聽瓚裁處

明史稿

以宣慰楊輝奏天元作大壩苗叛勅都御史張瓚討之駐軍黃平

輝初欲奪嫡子愛爵與庶子友計無所出因思爲友樹功遂誣奏苗叛得旨征之復誣奏友功得授

安撫使因種播凱之隙孫志

按明史言友授宣撫而孫志言安撫與蠻司合誌之設安撫於安寧授友安撫使合引見土官而合誌本條又注云安撫紀錄彙編作宣撫今兩存之

十二年冬十一月四川巡撫張瓚字宗器討灣溪蠻寨

名地在今平越府黃平州重安廢司境蠻破之通鑑輯覽

先是播州致仕宣慰楊輝言所屬天壩干蠻寨名地在今

遵義府播州廢司境地及重安長官司所轄灣溪等寨屢被

生苗竊據請王師進討詔瓚親至播州諭還侵地

不服卽征之事在十年至是瓚督兵攻敗諸苗奏設安
寧宣撫司卽以輝子友爲之詔從其請通鑑輯覽
設安寧宣撫司懷遠宣化二長官司靖南龍場二堡
撥兵戍守

瓚督諸軍及輝攻灣溪天壩干諸苗凡破山寨十
六斬首四百餘級撫男女九千餘口事下兵部以
苗來撫者多宜量爲處分瓚議設安寧宣撫司並
懷遠宣化二長官司建靖南龍場二堡命輝董其
役輝調軍民五千餘眾立治所屬黃平土司
等分甃城垣將竣輝以聞因謂各寨苗蠻百區畫

來頗知畏懼但工竣後大軍還難保無虞播州向設操守土兵共一千五百人今撥守懷遠靖南天漂龍場各二百人宣化百人安寧六百人其家屬宜徙之同居爲固守計其工之未畢者宜用臣子愛董之而聽臣致仕如故詔從之

明史稿

十五年貴州巡撫陳儼奏苗賊齎果轉橫乞調川湖官軍聽節制不許

灣溪既立安寧宣撫爛土諸蠻惡其逼遂引齎果等攻陷天漂靖南城堡圍安寧愛新襲力弗能支求援於川貴二鎮於是兵部奏再起輝勦之又勅

川貴兵爲助至是貴州巡撫陳儼奏苗賊竊果轉
橫乞調川湖等官軍五萬五千尅期會貴州聽巡
撫節制兵部言賊作於四川而貴州守臣自欲節
制諸軍恐有邀功之人主之且興師五萬以半年
計須軍儲十三萬五千石山路險峻輸運之夫須
二十七萬眾况天將暑瘴癘可虞帝然其奏明史稿
二十二年秋九月遣刑部侍郎何喬新聽訟播州
播州宣慰使楊輝欲立庶子友爲嗣長官張淵阿
順之安撫宋韜等諫乃止輝致仕嫡子愛嗣輝與
淵謀割地授友巡撫張瓚受輝賂爲奏設安寧宣

撫司以友爲之至是輝死友誣愛謀逆聞於朝遣
喬新往勘將行請曰楊氏主播州五百餘年蠻夷
服從小矣歷代寬以文法蓋治之以不治也今但
宜二人面質真僞無令驚疑喬新至盡得其始末
白愛誣奪友官安置他府斬張淵播州遂安

綱鑑通編

三編通鑑
輯覽同

二十二年詔刑部侍郎何喬新錦衣指揮劉綱會
西川撫按勘播凱訐奏事時楊友誣愛妖言不法
等事新等勘得友初欲奪愛官因而誣罔具以聞
慮其仇殺遷友他郡二十三

元作
今正

二年秋巡撫劉

璋奉旨革罷楊友宣撫移之保寧初璋計以安寧
道路險遠城堡堅固友之親黨么仲等家俱驍勇
乃閱詔不發先使友所親信詣安寧撫慰友家黨
與因遣能幹土官領兵防其出入又榜示以散其
黨與購其主謀部分既定並收其家屬發遣之孫志
二十二年刑部侍郎何喬新以愛爲其兄宣撫楊
友所訐奉命往勘因奏楊氏據播已五百餘年蠻
民服從久矣奢僭淫暴之罪無代無之歷朝皆寬
以文法治以不治今友愛兄弟相訐命臣等勘問
果係情重當於本州監候則獄卒皆其部下難於

防守使移於重慶則道路遼遠蠻衆驚疑恐生他
變宜撫提二人面對虛實聽候上裁免其監禁爲
便從之二十三年喬新奏輝在日溺其庶子友欲
令承襲長官張淵阿順之安撫宋韜謂楊氏家法
立嗣以嫡愛宜立輝不得已以職授愛又欲割地
以授友謀於淵因以天壩干乃本州懷遠故地爲
生苗所據請兵取之容山長官韓瑄以土民安輯
日久不宜征淵與輝計執瑄杖殺之前巡撫張瓚
受輝賂以其地設安寧宣撫司以友任宣撫輝立
券以所有金玉服用莊田召諸子均分之輝沒淵

乃與友潛謀刺愛淵弟深亦與謀不果友遂奏愛
居處器用僭擬朝廷又通唐府密書往來私習兵
法天文謀不軌事皆誣帝命斬淵深以愛信讒薄
兄友因公擅殺且謀嫡盜官錢皆有罪愛贖復任
友遷保寧羈管保寧仍勅喬新從宜處治明史稿
二十三年喬新奏云云熈寧輝沒淵與友同謀刺
愛不果友遂奏愛言愛結苗夷反叛造火器旗纛
金瓜鉞斧調總旗等號親軍閹割土民立金龍門
於宅前而開尚甕等鐵冶令僞閹官煉熟鐵爲軍
刀置織造院收民人趙某一百餘戶充織匠造龍

鳳蟒袍立商稅局於白田壩起調軍兵三千餘眾
假水西送喪演習武藝設教坊司以僞閣官掌其
事虜良家龐兆期女勝真福真等一百餘名充女
樂教習雜劇每遇節旦愛衣龍衣自稱國王天主
而稱其妻地主且置後宮奪趙高僧幼女玉真爲
宮妃用師巫魘魅庶母賈氏禁父妾馬真蔣真等
宮中姦使有身嘗強淫宮婢宋真不從凌辱狼籍
而後殺之科派各里人民分上中下三戶得金銀
若干萬兩養老莊田子粒若干萬石珊瑚樹若干
株珍珠簾若干絳玉圭若干笏馬若干匹牛若干

頭嘗夢騎龍登天門上帝謂之曰此南方帝子也
又通唐府密書往來私習兵法天文謀不軌事皆

誣云云

明史紀
事本末

按今遵義縣東鄉新舟場側之官城楊友所築
城之址相傳友與愛爭地於此交戰死者萬餘
人今耕者往往於沙中得箭鏃又綏陽縣朗山
關大營堡傳亦楊愛弟兄爭地駐營所採

孝宗宏治元年增設重安守禦千戶所命播州歲調
土兵一千助戍守

七年以平苗功愛與有勞難加秩賜勅勞之

十四年調播州兵五千征貴州賊婦米魯等

武宗正德二年升播州宣慰使楊斌爲四川按察使仍理宣慰事明年裁之仍原職尋勅令每年巡視邊境進致仕宣慰愛階及服色

舊制土官有功賜衣帶或旌賞部眾無列銜方面者斌狡橫不受兩司節制諷安撫羅忠等上其平普安戰功重賂劉瑾得之踰年巡按俞緇奏斌不宜授詔裁之仍原職初友旣編置保寧愛蓋恣厚斂以賄中貴征取友向所居凱離作棚地者獨苛同知楊才居安寧乘之賸剝尤甚諸苗憤怨凱離

民爲友奏復官弗得乃潛入保寧以友還糾眾作亂攻播州焚愛居第及公私廨宇略盡遂殺才多所殘戮愛屢奏於朝帝乃命鎮巡官調兵征之會友死而川兵方調征他盜遂緩師至是鎮巡官言友構亂罪大然其身已死其子宏尙幼今宏稍長能悔過自新且善撫馭蠻眾願聽其約束其前爲友所焚殺者俱已隨土俗折償且還所侵奪於官乞授宏冠帶名爲官帶土舍協同播州經歷司撫輯諸蠻其家置保寧者仍歸之隸播州管轄並諭斌與宏協和不得再造釁端報可未幾播州安撫

宋淮奏貴州凱日爛土苗婚於凱離草塘諸寨陰相構結誘山苗爲亂乞賜斌勅令每年巡視邊境會湖廣鎮巡官撫處部議土官向無領勅出巡者諭斌宜撫綏士衆輯睦親族以副朝廷優待之意因加授愛昭毅將軍給誥命賜麒麟衣一襲時斌又爲其父請進階及服色禮科駁之以服色等威所繫不可假兵部以愛舊有勲賊功皆許之旣而斌復爲其子相請入學並得賜冠帶

並明史稿

五年詔復革爵土官楊友安撫使巡撫林俊疏止不報

友既革職羈管至是重賄劉瑾求復原職詔許之
俊疏言亂階不可啟大忤瑾意志

按孫志與當時相去未遠此條所據必確足以
補諸史之闕史稿謂至是鎮巡官言友身已死
子尚幼今宏稍長云云承二年之踰年則是正
德三年友死已久時事與志皆不契而史稿又
云初愛厚斂餽中貴當卽指二年賂得按察事
又書凱里民爲友奏復官弗得乃潛入保寧以
友還又糾眾作亂愛又屢奏帝乃得命征之而
值友死此必非一二年事疑史稿於初友旣編

置保寧之上尙有脫文志之詔復安撫當卽在
凱里民爲奏復官時史之勅斌巡邊境進愛階
服賜相冠帶又在後數年矣

重慶人曹弼糾播州眾寇川南

吳景正德中官四川僉事守江津重慶人曹弼亡
命播州糾眾寇南川謀與大盜藍廷瑞合六年正
月逼江津御史俞縉遁去屬景及都指揮龐鳳禦
之鳳邀景俱走不可率典史張俊迎擊城陷不屈
並被殺

明史忠義傳

十二年宣慰楊斌父喪援例守制

播州安撫羅忠宋准奏宣慰楊斌有父喪欲援文
臣例守制但邊防爲重乞仍令掌印理事

明史稿

按自是斌尋致仕子相襲

貴州巡撫鄒文盛遣參議蔡潮入播州撫苗蠻

初凱里

此不作離與明史合

土舍楊宏與重安土舍馮綸等

有怨宏卒綸等誘苗蠻攻之更相仇殺侵軼貴州
境巡撫鄒文盛言狀且請移文四川會官撫處踰
歲不報乃遣參議蔡潮入播州督致仕楊斌撫平
之因言宜復安寧宣撫俾宏子弟襲之斌未衰宜
仍起任事以制諸蠻潮有撫蠻勞宜量擢兵部議

安寧已革不可復斌子旣代亦不可起土官應襲與否屬四川非黔所得專盛所請難行而功不可

証

明史稿
詳定續傳 兼

按此條上史稿有脫文

十六年賜斌蟒衣玉帶

世宗嘉靖元年賜播州宣慰司四書集註一部

從宣慰楊相奏也

復安寧宣撫司改爲凱里宣撫司隸貴州以楊張襲宣撫使

宏旣死其弟張求襲父職不得時盜邊劫白泥司

印信復與相構兵守臣乞收凱里屬貴州以張爲
土知州解釋之兵部謂張習父兄之惡幸免於辜
而敢肆然執印信以要挾當命川貴守臣按其前
後爭產殺人諸罪寘於理若張悔過輸情還所獲
印尚可量授一官聽調殺賊以自効倘或怙終必
誅以爲玩法戒旣遂許張襲宣撫而改安寧爲凱
里隸貴州

二十三年宣慰楊烈與水西構難殺其長官王黻

先是楊斌子相襲播宣慰職以祖父嫡庶讎殺沿
禍數世至今不已相不之鑒仍寵庶子煦欲奪嫡

烈而其妻張氏甚悍與子烈盜兵逐相走水西死烈乃乞水西還父屍播故有水烟天旺地與水西近水西宣慰安萬銓屢挾奏不得至是要之必歸地而後予屍烈陽許之及得屍悔約讐殺相攻剽垂十年

崇司合志

三十三年總督馮岳調總兵石邦憲討平王黻黨李保遂擒真州亂苗盧阿項

烈殺長官王黻時嘉靖之二十三年也烈既代襲遂與黻黨李保治兵相攻垂十年總督馮岳調總兵石邦憲討平之真州苗盧阿項者亦人稱亂邦

憲以兵七千擊敗之有言賊求援於播者邦憲曰
吾方調水西兵聲楊烈助逆罪烈暇救人乎已擒
阿項父子斬獲四百餘人

明史稿

總督侍郎馮岳討平之岳乃奏三省接壤民苗之
衝若四川餘慶之走馬坪播州之三度關貴州石
阡之龍泉司各立哨堡於重慶偏橋等衛委指揮
三人督兵防守仍移銅仁參將於石阡移思石守
備於龍泉控扼播州令犬牙相制而後設重慶府
通判一人使之駐龍泉以收糧稅則控馭較便也

上然其言

蠻詞合誌

復以播州隸四川仍制於貴州思石兵備道

初嘉靖初議分凱里屬貴州旣又以播地多在貴州境并改屬思石兵備及真州盜平地方安靖播人以爲非便川貴守臣異議不決命勘總督奏仍以播歸隸四川而貴州思石兵備仍舊兼制播西平邑諸土司事報可

穆宗隆慶五年烈死子應龍請襲命姑子職

神宗萬厯元年給播州新襲宣慰使楊應龍勅書

八年賜故宣慰楊烈祭葬從應龍請也

十四年應龍獻木賜飛魚服授都指揮使銜

應龍獻大木七十材美賜飛魚服又復引其祖斌
賜蟒例部議以斌有軍功且出特恩未可爲比帝
命以都指揮使銜授應龍

並明史稿

按孫志載應龍獻大木賜大紅飛魚服糸十三
年

調播州兵征松番

是年正月松番諸番作亂四川巡撫徐元泰決計
大征命游擊周于德將播州兵爲前鋒六月班師
十五年七月李應祥平越黨諸衛師旋徐元泰益
徵播州西陽諸土兵合五萬人令應祥督邊之垣

朱文達及周于德三道入討邛部屬夷以其地置

屏山縣

明史李應祥傳

按郭子章西南三征記云乙酉夏楊柳番嘯聚諸番聞於朝則以兵屬今都督李將軍應祥十月徐公至蜀十一月擁眾突犯公上疏得請益徵播州西陽平茶諸土兵丙戌正月諸路兵繹至乃檄遊擊周于德將播州七千人營羅鍋嶺參將朱文達將平茶兵四千五百有奇營茨溝而一統於李將軍云云五月克牛尾牛尾樹柵自雄將軍分兵三路宣慰楊應龍以所部精兵

從中擊之云云乃疏功於朝又疏建越倒懸急
矣請拯之制可徵諸路兵益之丁亥四月方欲
下令解甲復手疏請討功部夷仍徵土漢兵四
萬有奇以冬十月出師十二月癸酉克白窰天
星固賊萬餘團四山分支接戰我兵冒險攻之
播州兵先登各路兵齊擊賊大敗遁明年正月
己丑賊糾眾由大南門大木瓜兩路突襲馬營
播州帥楊應龍率眾大呼衝之賊退云云五月
班師考乙酉萬厯十三年史係十四年者以兵
至日爲言也

十八年貴州巡撫葉夢龍疏論應龍兇惡諸事巡按陳效歷數應龍二十四大罪

時方防禦松潘調宣慰土官兵協守四川巡按李

化龍疏請暫免勘問俾應龍戴罪圖功

按孫志云十八年楊

應龍與土鎮官旗令復

調應龍領兵征疊茂由是川貴撫按疏辨在蜀

者謂應龍無可勘之罪在黔者謂蜀有私暱應龍之心於是給事中張希舉等以事屬重大兩省利害豈漫不相關者乞從公會勘無執成心十九年貴州夢熊主議播州所轄五司改土爲流悉屬重慶與化龍意復相左化龍遂引嫌求斥蓋應龍本

雄猜阻兵嗜殺所轄五司七姓悉叛離婁妾田屠
妻張氏并及其母於是妻叔張時照與所部何恩
宋世臣等上變告應龍反夢熊請發兵勦之而蜀
中士大夫率謂蜀三面隣播屬裔以什百數皆其
彈壓且兵驍勇數征調有功剪除未爲長策以故
蜀撫按竝主撫朝議命勘應龍願赴蜀不赴黔明

史稿

二十年檄楊應龍至重慶府聽勘拘留之俄而兵部

復趣應龍選兵征倭

孫志

應龍詣重慶對簿繫論法當斬請以二萬金贖衛

史張鶴鳴方駁問會倭大入朝鮮徵天下兵應龍
因奏辨且願將五千兵征倭自贖詔釋之兵已啓
行尋報罷巡撫王繼光至嚴提勘結應龍遂抗不
出張時照等復詣奏闕下繼光用兵之議遂決明史稿

二十二年巡撫王繼光遣總兵

此下當脫劉承嗣參將五字郭成

征楊應龍於白石口不利

孫志

二十一年繼光至重慶與總兵劉承嗣分兵三道
進婁山關屯白石口應龍佯約降而統苗兵據關
衝擊承嗣兵敗殺傷大半會繼光諭罷卽撤兵妻

棄輜重略盡黔師協勦亦無功時四川新撫譚希思與貴州鎮撫再議勦御史薛繼茂主撫應龍上書自白遣其黨攜金入京執原奏何恩詣綦江縣

明史稿

二十二年春四川參將郭成總兵劉承嗣統兵征楊應龍敗績於白石口全軍俱覆成僅以身免江綦志

按繼光征應龍事史稿云二十一年孫志與綦志並云二十二年兩存以俟考又綦志書參將郭成總兵劉承嗣敗白石口兵防祥異皆然而

其宦績乃單云總兵郭成亦如孫志當亦有脫

文也

二十三年勅總督侍郎邢玠勘播事

孫志

二十二年以兵部侍郎邢玠總督貴州二十三年玠至蜀察永寧西陽皆應龍姻媾而黃平白泥久爲仇讐宜剪其枝黨乃檄應龍謂當待以不死會水西宣慰安疆臣請父國亨卹典兵部尙書石星手札示疆臣趣應龍就吏得黃疆臣亦奉札至播招應龍當是時七姓惟恐龍出得除罪而四方亡命竄匿其間又幸龍反因以爲利驛傳文移輒從

中阻四月玠檄重慶知府王士琦詣綦江趣應龍
就安穩聽勘應龍使弟兆龍至安穩治郵舍儲糧
叩頭郊迎致餼牽如禮言應龍縛渠魁待罪松坎
所不敢至安穩者恐墮安穩仇民不測之禍也幸
請至松坎受事士琦曰松坎亦曩奏勘地也卽單
騎往應龍果面縛道旁泣請死罪請治公館執罪
人及罰金獻廷中得自比安國亭國亭者曩亦被
訐懼罪不出界故應龍引之士琦爲請於玠許之
應龍乃縛獻黃元阿羔阿苗等案驗抵應龍斬以
其族得論贖輸四萬金助採木仍革職以子朝棟

代受職次子可棟羈府追贖黃元等斬重慶市總

督以聞時倭氛未靖本兵二字當依史作兵部欲緩應龍事

東方朝廷亦以應龍向有積勞可其奏於松坎設

同知治焉而以士琦爲川東兵備副使彈治之應

龍獲寬益怙終不悛尋可棟死於重慶益痛恨促

喪歸不得復檄完贖大言曰吾子活銀卽至矣擁

兵驅千餘僧招魂去分遣土目置關據險厚撫諸

苗名其健者爲硬手州人稍殷厚者沒入其貲以

養苗苗人遂願爲死力明史稿

設安邊同知於松坎尋序詳宦績傳

甲午春參將郭成總兵劉承嗣白石口敗績殞於
兵刃者數千成僅以身免事聞上命制府勦撫屢
遣官諭以禍福酋負固不出制府再命綦江知縣
蒲林往龍素警服見林單騎至倒戈以迎隨面宣
德意約其降待以不死賊俛首聽命制府尋委監
司同林往松坎就勦皆款服竟從寬典議於安穩
按安穩當作松坎綦志又於祥異中書此事亦立
作安穩皆與史乖刺唯其官鎮中作松坎是
安邊同知卽以林陞任請旨班師犬羊性不常旋
又擾扶歡壩羅王村等處報日急林奮身往追賊
卽捲甲引去又明年秦民袁子昇爲賊大讐適繫

合江縣獄賊發兵圍之指索子昇當事著林往林
說合江縣出子昇棄一秦囚保全眾億讒忌者卽
騰謗詔下本省逮勘卒以此去任林去而賊益無
忌矣

紫江
舊志

按孫志云二十四年議增安邊坐鎮同知不果
今以林事考之所謂不果者謂旋廢非謂其未
設也云二十四年者林升同知明年去而此職
遂廢在其年也

二十四年應龍殘餘慶掠大阡都壩焚劫草塘餘慶
二司徧及興隆都司各衛又遣兆龍圍黃平戮重安

長官家勢復大熾

二十五年應龍流劫江津及南川臨合江索其仇袁子昇縋城下磔之

時兵備王士琦調征倭應龍益統苗兵大掠貴州洪頭高坪新村諸屯已又侵湖廣四十八屯阻塞驛站訶原奏仇民宋世臣羅承恩等挈家匿偏橋衛襲破之大索城中戮其父母淫其子女備極慘

告並明
酉史稿

秋七月播州宣慰使楊應龍叛

通鑑
輯覽

二十七年春三月以李化龍總督川湖貴州軍務討

楊應龍

先是貴州巡撫江東之令都司楊國柱指揮李廷

棟率部兵三千勦應龍應龍遣子朝棟弟兆龍

志於此下多書一人名等

迎敵于飛練堡賊佯走天邦固

誘官軍盡殲之國柱等皆死東之罷以郭子章代

而命化龍節制川湖貴三省軍事調東征諸將劉

綖麻貴陳璘董一元南征六月應龍乘大兵未集

遂勒兵犯綦江城中新募兵不滿三千賊兵八萬

奄至圍綦江城

參將房嘉寵游擊張良賢率

師巷戰俱死

應龍因劫縣令焚掠出綦江庫犒

師盡殺城中人投屍蔽江水爲赤尋退屯三溪

結九股生苗及黑腳苗爲助原注應龍以綦江之

鄉坦立石爲插界號宣慰官莊聲言江津台江皆

插故土時郭子章日夜徵調各漢土兵分守南川

台江等處軍聲漸振應龍僞軍師孫時泰請應龍

直取重慶搗成都切蜀王爲質而應龍遙延不進

止言爭界給葬以冀曲赦化龍至成帝聞綦江破

都以徵兵未至亦謬爲好語縻之賜化龍劍假便宜討賊十月化龍移駐重慶已而

應龍屯官壩聲言窺蜀又焚東坡爛橋楚黔路梗

黃平龍泉所在告急賊復據偏橋出掠興隆鎮遠

化龍議置勁兵萬餘據守要害通黔楚道益調諸

路兵以俟大舉

通鑑輯覽

以征播故暫設巡撫偏沅地方贊理軍務一員尋

罷明史職官志

初賊本無意竟反徒以安忍猖狂既覆我師飛練則騎虎勢不得下於是益結九股生苗及黑腳苗等為助十一月應龍屯兵官壩聲言窺蜀已而焚

東坡爛橋楚黔路梗貴州通志

冬十月加四川湖廣田賦以播州用兵故通鑑輯覽

二十八年正月應龍五道並出破龍泉司明史稿

應龍破龍泉司守備楊惟忠擁兵二千以勢不敵

避去土官安民志率五百拒守死之貴州通志

夏六月李化龍帥師平播州

楊應龍勒兵數萬五道並出攻破龍泉司時化龍徵兵大集大會文武於重慶登壇誓師分八路進兵川師四路總兵官劉綎由綦江入總兵官馬孔英由南川入總兵官吳廣由合江入副將曹希彬受廣節制由永寧入黔師三路總兵官童元鎮由烏江入參將朱鶴齡受元鎮節制統宣慰使安疆臣由沙溪入總兵官李應祥由興隆入楚師一路分兩翼總兵官陳璘由偏橋入總兵官陳良珙受璘節制由龍泉入每路兵三萬官兵三之士司七

之巡撫郭子章駐貴陽湖廣巡撫支可大移沅州
化龍自將中軍策應部署既定劉綎遂從碁江進
兵破其前鋒楊朝棟僅以身免賊皆膽落連克桑
木烏江河渡三關奪天邦諸固乘勝入婁山關屯
白石應龍率諸苗決死戰綎親勒騎衝中堅分兩
翼夾擊敗之追奔至海龍固時陳璘已破青蛇固
安疆臣亦奪落蒙關吳廣從崖門關入營水牛塘
與賊力戰三日卻之遂攻燒二關奪賊樵汲路賊
見勢急父子相抱哭上固死守遣使詐降化龍檄
諸將斬使焚書已而八路兵大集海龍固下遂築

長圍更譖迭攻賊大困會化龍聞父喪請假歸
視師化龍念賊圍前險不能越令馬孔英勒兵
其後天久雨將士馳泥淖中苦戰絕先士卒克土
城應龍益迫散金募死士拒戰諸苗皆駭散無應
者起提刀巡壘見四面火光燭天大兵已登圍入
應龍倉皇同愛妾二闔室自縊生擒朝棟兆龍等
百餘人計出師至滅賊百十有四日化龍露布以
聞詔磔應龍屍戮朝棟兆龍等於市以其地置遵
義平越二府分屬川貴

通鑑
輯覽

二月癸未播賊襲執宣慰宋承恩去承恩應龍壻

也時總督李化龍已移駐重慶征兵大集遂以十
二月丙戌誓師分八路路約三萬人官兵三之士
司七之川師四路總兵劉綎從綦江入以參將麻
鎮等隸參政張文耀監之總兵馬孔英從南川入
以參將周國柱宣撫冉馭龍等隸僉事徐仲佳監
之總兵吳廣從合江入以參將徐世威等隸參議
劉一相監之副將曹希彬受廣節制從永寧入以
參將吳文傑永寧女土官奢世續等隸參議史旌
賢監之黔師分三路總兵童元鎮統鎮雄土知府
隴澄泗城土知府岑紹勳等由烏江參將朱鶴齡

受元鎮節制統宣慰安疆臣等由沙溪總兵李應
祥統宣慰彭元璠等由興隆參議張存意按察司
楊寅秋監之湖廣一路由偏橋分兩翼總兵陳璘
統宣慰彭養正等由白泥副總兵陳良玘受璘節
制統宣撫覃宜等由龍泉副使胡桂芳參議魏養
蒙監之巡撫郭子章駐貴陽湖廣巡撫支可大移
沅州總督李化龍自將中軍策應諭諸將以抵婁
山等關爲期且曰關外且戰且招降多不可勝誅
也關內疾戰勿受降師不可久老賊詐不可信也
綦江道最要綏當之應龍熟練才頗懼益兵守要

害十五日諸將克丁山銅鼓崖村遂直搗楠木山
羊簡臺三峒峒絕險賊將穆照等衆數萬連營諸
將憚之縱分兵攻其三面大戰於李漢壩生擒其
魁餘賊奔入峒乘勢直搗峒前焚之賊多死盡克
三峒擒穆照及賊魁吳尙華是日縱督戰左持金
右挺劍大呼曰用命者賞不用命者齒劍鬪死者
四十人遂大捷三月應龍乃遣子朝棟惟棟及其
黨楊珠統銳卒數萬由松坎漁渡羅古池三道並
進縱伏萬人羅古待松坎賊以萬人伏營外待漁
渡賊而別以一軍策應賊果至伏盡起縱率部下

轉戰斬首數百追奔五十里朝棟潰圍走幾爲
師獲應龍憚縉威名意首挫其鋒屬朝棟悉勁兵
間道相角曰爾破綦江馳南川盡焚積聚餘無能
爲也及朝棟敗益膽落聚守石虎關縉亦掘塹守
初縉聞征播命逗遛多設難要朝廷言官交劾縉
議調南京右府僉書縉至是聞之卽辭任李化龍
以平播非縉不可固畱之力薦於朝縉乃復受事
遂進克石虎關拔賊滴淚三坡瓦窰坪諸隘直抵
婁山關婁山萬峰插天叢箐中一徑纔數尺賊設
木關十三座排柵置深坑百險俱備縉分奇兵爲

左右路間道趨關後而自督大軍仰攻奪其關追至永安莊兩路軍亦會時三月二十九日也綖老將持重慮賊衝突聯諸營一據婁山關爲老營一據白石口爲腰營一據永安莊爲前營都指揮王芬者勇而寡謀每戰輒請爲前鋒連勝有輕敵心獨營松門堦之衝距大營數望賊方有烏江之勝謀再奪婁山適穆照遣人洩芬孤軍狀四月朔賊乃襲殺芬守備陳大綱天全招討楊愈亦死失亡士卒二千人綖聞急往救部將周以德周敦吉夾攻賊始大奔追至養馬城而還是日應龍幾被獲

乃不敢窺婁山。繼懲前失，劄近關堅壁，請濟師
踰十餘日，克後水圍營於冠子山，尋奮馬孔英壁
海龍岡，下孔英道南川，獨險遠去，應龍海龍岡六
七百里未至重慶時，推官高折枝監紀軍事，請獨
當一面，乃與參將周國柱先以石柱宣撫馬千乘
兵破賊金筑，復督酉陽宣撫冉馭龍敗賊於官壩。
時賊旣破龍泉，方移師攻婺川，聞敗乃遁。及孔英
至，軍平茶邑，梅兵亦集，軍容甚壯。先師期一日入
真州，用土官鄭葵駱麟爲鄉導，別遣邊兵千扼明
月關，諸軍鼓行前進，破四寨，攻赤崖，抵清水坪，封

寧關悉破賊營十數逼桑木關關內民降者日千計折棧結三大寨處之禁殺掠降者日衆賊益孤關爲賊要害山險箐深賊憑高據守三月初八日乃令千乘馭龍出關左右國柱搗其中賊用標槍藥矢銳甚官軍殊死戰奪其關逐北至風坎關賊復大敗連破九杵黑水諸關苦竹羊崖銅鼓諸寨國柱攻金子壩無一人疑有伏焚空寨十九嚴兵以待賊果突出擊敗之孔英乃畱王之翰兵守白玉臺衛餉道平茶邑梅兵守桑木關而親提大軍進營金子壩應龍聞桑木關破大懼遣弟世龍及

楊珠以銳卒劫之翰營之翰走殺餉兵無算卒茶
兵來援賊始退孔英還擊世龍復不勝步卒發火
箭裨將劉勝復奮擊賊乃奔官軍進朗山口由朗
山進發蒙子橋深箐翳賊處處設伏悉勦卒之
應龍遣其黨詐降謀爲內應折枝盡斬之伏以待
賊果夜劫營伏發賊驚潰追奔至高坪已奪賊資
馬城直抵海龍第二關下賊守兵益多孔英軍已
深入而諸道未有至者西陽延綏兵皆退賊躡殺
官兵六十人居數日劉綏兵至乃合兵連克龍爪
海雲諸囤壓海龍囤而壘初總督李化龍刻師期

諸將莫利先入孔英所將邊卒及諸土兵皆獷悍
監紀折枝勇而有謀故師獨先入道至囤前吳廣
出合江屯二郎壩大行招徠賊驍將郭通緒者迎
戰將士襲走之陶洪安村羅村三寨土官各出降
他部來歸者數萬廣擇其壯者從軍通緒扼穿崖
囤廣督土漢軍擊破之劉綖馬孔英已入播廣猶
頓二郎總督李化龍趣之乃議分四哨進攻崖門
別遣奢世續等督夷兵二千扼桑木壩諸要害以
防饑道諸將連破數囤進營母豬塘應龍令通緒
盡發關外兵拒敵廣伏砲手五百於磨槍壩外南

岡下而遣裨將趙應科挑戰兩山相夾中甚隘
通緒橫架衝應科科佯北通緒追出亞遇伏急旋
馬中砲墮方躍上他馬伏兵攢刺之殪餘賊大奔
官軍逐北賊盡降遂薄崖門徑小止容一騎賊眾
萬餘出關拒戰曹希彬懸賞千金士攀崖競進追
至第四關關上男女盡哭於是賊黨自殺其魁羅
進恩率萬餘人出降其第一關猶拒不下廣乘夜
疾進奪其關關內民爭獻牛酒時李應祥陳璘猶
在關外廣合希彬軍連戰一碗水土崖分水關皆
捷遂進營水牛塘應龍知廣軍孤深入謀欲襲之

乃遣人詐降廣測其詐堅壁以待應龍擁眾三萬直衝大營諸將殊死戰會他將來援師乃退廣遂進壁海龍國童元鎮督永順泗城鎮雄諸土軍由烏江初元鎮先駐銅仁憚應龍人不進屢趣乃行時劉綎吳廣諸軍已進羣賊議分兵守其參謀孫時泰曰分兵則力薄乘官軍未集先破其弱者餘自退矣應龍善之聞元鎮將抵烏江應龍曰此易與耳縱之渡江密以計取監軍楊寅秋言烏江去播不遠宜俟諸道深入協力齊驅元鎮不從於是永順兵先奪烏江賊遣千餘人沿江叫罵以誘之

諸軍旣濟復奪老軍關前哨參將謝崇爵乘勢督
泗城及水西兵再拔河渡關三月望賊以步騎數
千先衝水西軍軍中驅象出戰賊多傷俄駕象者
斃象反走擲火器者又誤擊己營陣亂泗城兵先
走崇爵亦走爭浮橋橋斷殺溺死者數千人河渡
旣敗烏江軍相去六十里猶未知明日參將楊顯
發永順兵三百出哨道遇賊數萬咸爲水西裝永
順兵不疑與盟誓賊掩殺三百人亦襲其裝直趨
烏江烏江軍信爲水西永順兵不設備遂爲賊所
破爭先渡江賊先斷浮橋數千人皆溺死顯及二

子與焉元鎮所部三萬人不存什一將校止崇爵
等三人江水爲不流貴陽聞警居民盡避入城遠
近震動化龍用上方劍斬崇爵益徵兵檄鎮雄土
官隴澄邀賊歸路隴澄者卽安堯臣水西安疆臣
弟也軍不與元鎮合獨全當事頗疑其通賊寅秋
以鎮雄去播止二日令搗巢立効澄許之河渡未
敗時澄已遣步將劉岳王嘉猷攻拔苦竹關及半
壩嶺既敗二將移新站賊伏兵大水田別以五千
人來襲敗還嘉猷乃揚聲搗大水田而潛以一軍
拔大夫關直抵馬坎斷賊歸路與疆臣合賊遂遁

會都指揮徐成將兵至合岑紹勦兵再克河渡關
賊將張守欽袁五受據長箐萬丈林永順兵擊破
之生擒守欽攻清潭洞復擒五受會朝議責元鎮
敗狀逮下獄令李應祥并將其軍應祥由興隆入
受事於二月下旬副將陳寅等已連克數囤拒賊
四牌高囤下別遣兵從間道直搗龍水囤他將蔡
兆吉又自乾坪抵箐岡過四牌賊首謝朝俸營其
地四面峭壁深箐賊從高鼓譟官軍殊死戰俘朝
俸妻子乘勢抵河畔會烏江敗書聞欽兵不進者
旬日應祥已受任趣諸將急渡寅等乃取他道渡

河而潛爲浮橋以濟師諸軍旣渡賊失險乞降者
相繼應祥悉受之賊所恃黃灘一關壁立衆死守
會賊徒石勝俸等率萬餘人降告曰去黃灘三十
里有三關入播門戶也先襲破之則黃灘孤難守
應祥然其計令偕陳寅率精卒四千夜抵關下勝
俸以數十騎誘開前門盡殲其戍卒黃灘賊懼益
增兵固守寅督諸將渡河攻關前勝俸由墳林暗
渡襲關後賊乃大敗應祥遂直抵海龍囤陳璘由
偏橋進軍次白泥應龍子朝棟率賊二萬渡烏江
迎戰璘前禦之而分兩翼躡其後賊少挫追奔至

龍溪山賊合四牌賊共拒璘四牌在江外與江內
七牌皆五司遺種九股惡苗素助賊璘廣招撫乃
進軍龍溪諜報有伏令游擊陳策以火器擊之賊
據險矢石雨下璘先登斬小校退者以徇把總吳
應龍等陷陣賊大潰退拒四牌保兒囤璘遣二裨
將逼之中伏璘募死士從應龍等奮擊賊復潰奔
據固嶺夜由後遁黎明追及於袁家渡賊復敗悉
渡江遁四牌之賊遂盡三月望諸軍爲浮橋渡江
知賊將張佑謝朝俸等營七牌野豬山璘卽夜發
抵苦練坪前鋒與戰後軍至夾擊之賊敗逃深箐

官軍遂入苔菜關會童元鎮烏江師敗璘大懼請退師李化龍不可璘乃進營楠木橋次湄潭賊悉聚青蛇長坎瑪瑙保子四固地皆險絕而青蛇尤甚璘議同日攻則兵力弱止攻一固則三固相助乃先攻三固次及青蛇良珙師亦來會令伏固後別以一軍守板角關防賊逸璘督諸將力攻三日賊死傷無筭三固遂下青蛇四面陡絕璘圍其三面購死士從瑪瑙附葛至山背舉砲賊惶駭諸軍進攻焚其茅屋賊退入固內木石交下將士冒死上燬大柵二重前後擊之賊大敗七牌之賊亦盡

時四月十三日也乃分兵六道攻克大小三渡關
乘勝抵海龍固海龍固者賊所倚天險飛鳥騰猿
不能踰者及諸路兵俱集固下賊見勢急父子相
抱哭上固死守每路投降文緩我師化龍檄賊詭
降卽斬使焚書無爲所給虞綖與應龍舊檄無通
賊綖械其人自明賊詭令婦人於固上拜表痛哭
云田氏且降詐爲應龍仰藥死報吳廣廣輕信按
兵不動已覘知田氏詐降緩攻而所云應龍死乃
川兵攻固以火砲擊死所謂楊珠也珠驍勇善戰
旣死賊痛如失左右手廣覺詐蓋列兵協攻燒二

關奪三山絕賊樵汲五月十八日始築長圍化龍
令諸將分日迭攻安疆臣攻固後受賊重賄多與
通且潛以火藥賂賊故賊不備其後陳璘知之與
監軍者謀令疆臣退一舍璘移其處置鐵牌百餘
距國丈許賊强弩無所施又爲籐板於柵前賊每
夜出劫爲釘傷不敢復出會化龍聞父喪詔以墨
綬視事化龍跣而草檄盡治軍時天苦雨將士馳
淖中苦戰六月四日天忽開朗五日劉綎身先士
卒進克土月二城應龍盡追夜散數千金募死士
拒戰諸苗皆駭散無應者起提刀自巡壘見四面

火光燭天徬徨長嘆泣與妻子曰吾不能復顧若
矣六日陳璘與吳廣當進兵璘夜四鼓銜枚上賊
艤睡斬其守關者樹白幟鳴砲賊大驚潰散廣兵
亦至應龍倉皇同愛妾二闔室縊且自焚廣獲其
子朝棟及妾田雌鳳急覓屍出焰中廣中火毒失
聲幾絕頃而蘇自出師至滅賊百十有四日總督
李化龍露布以聞十二月庚辰督撫李化龍郭子
章江鐸俘楊朝棟等獻於闕下丙寅上御樓受之
羣臣稱賀命磔楊朝棟等於西市釋宋承恩貴州通志
播賊躡綦後神宗震怒命兵部侍郎李化龍襲行

天討化龍視綦境內萬竈無烟百里盡赤急需守
令因疏推萬縣知縣周作樂升本府同知來攝縣
事有本官吏治最優擬地最善但綦江重任非此
人不足當之事竣另行優異之語周奉命單車於
庚子正月七日馳受事比至破城穢骨暴露猶填
巷道蓬蒿滿目瓦礫縱橫因張榜招集遺黎補葺
綢繆稍成人境倏傳賊目張漢清統苗入境傷弓
之鳥聞風欲周繫印危坐謂天戈不日西指反
賊子危於累卵何敢復來申諭再三離心始定乃
請兵以備防守請銀以便應用議速進兵以收武

功議寬投降以昭文德急發軍令以安小民悉從
其請間架既定復籌五策曰謹詐降曰慎防守曰
約會期曰速餉運曰嚴紀律當事優語褒答稱爲
經略鴻猷是年卽成戡定殊勳一切善後事宜妥
帖周詳尤有力焉

禁江
舊志

二十九年正月壬子朔頒平苗詔於天下

貴州
通志

四月詔郡縣播地建城署官立學則壤田賦置衛
所定屯田設兵備專將領

志

以播地分設遵義平越二府析置二州八縣遵義
桐梓綏陽仁懷四縣賓安一州屬遵義府隸四川

餘慶甕安涓潭三縣黃平一州屬平越府龍泉一縣屬石阡府隸貴州府州縣應有官皆增之如制因白田黃平舊學宮立二所學增立真安一州學城池公署以次修舉置威遠衛及官屬限其屯田置分巡兼兵備一員總兵官一員駐遵義府

撮平播善

後疏詳見各門

三十一年播州餘逆吳洪盧文秀等叛總兵李應祥等討平之

明史稿

洪播州逆酋楊應龍用事長官見應龍勢敗遂避貴州平定後復業與其黨盧文政劉堯等見改土

設流法度嚴密不得自逞借新民占產糾合沙溪
苗夷議立楊三老爲宣慰遍書僞檄諭夷漢頭目
將以十一月初九舉事兵備副使傅光宅知府蔡
鳳梧會同總兵李應祥先期擒斬之四詳土官
傳

按劉綎揭子云職東西征時曾帶回兵馬一萬
一千有奇復以征播班師被論回衛卽留遵義
仁懷赤水敘南建武馬湖等處善後耕種防守
如遵義兩值吳洪楊和尚之變俱賴若輩保禦
無恐據此則吳洪後尙有楊和尚之役諸志皆

失載

三十七年知府孫敏政定建府學於城中縣治左學

校門

四十六年加田賦畝三厘

九月加天下田賦帝以遼左軍餉不敷除貴州地
磽兼有苗變不加外餘省照萬厯六年會計錄派
定每畝加三厘六毫次年復加賦額

通鑑輯覽

按以輯覽兩年加賦總數計之次年所加三倍
三十六年之數

四十八年遷真安州治於三江里號新州治

正安志

熹宗天啟元年辛酉

原系萬曆四十八年辛酉

今正永寧土司奢寅

因調兵謀逆陷重慶九月遣逆目扶國禎破遵義殺

掠一空民罹難最慘

陳志

奢應周入祠梓知縣洪維幹

死之

桐梓志

天啟元年永寧奢崇明請調馬步兵二萬援遼崇

明與子寅久蓄異志借援遼遣其壻樊龍部黨張

彤等領兵至重慶久駐不發巡撫徐可求移鎮重

慶趣永寧兵樊龍等以增行糧為名乘機反殺巡

撫道府總兵等二十餘員遂據重慶分兵攻合江

納溪破瀘州陷遵義

明史永寧土司傳

天啟元年秋九月四川永寧土司奢崇明反崇明
外恭陰鷺子寅尤驍桀好亂時朝廷方遣官募川
兵援遼崇明父子請行先遣土目樊龍張彤等領
兵詣重慶巡撫徐可求議汰其老弱龍等遂反殺
可求及道府總兵官據重慶分兵攻瀘州合江納
溪破瀘州陷遵義崇明統所部與徼外雜蠻凡數
十萬播州遺孽及諸亡命奸人蠭起附之全蜀震
動乃進圍成都偽號大梁左布政使朱燮元將入
覲蜀王以亂畱治軍事燮元急趣近道兵赴援分
陴固守相持百餘日圍解燮元亦已授四川巡撫

帥師復州縣衛所

通鑑輯覽

按貴州通志書蘭賊陷遵義亦云在萬曆四十八年蓋承陳志之誤楊明吾家譜序云蘭酋作叛值天啟元歲九月二十三日走綏陽黃魚江避之年月與史合兼詳其日愈知二志之譌但序又以元年甲子爲壬戌亦誤同陳志

按重慶之陷遇難者有遵義參將萬全見朱燮元紀略

十二月復遵義

天啟元年宣慰司同知安邦彥詣巡撫李樸請援

遼欲乘以起事檄諭止之歸益爲反謀檄累疏請
增兵餉置不問檄被劾六疏乞休十月始得請以
王三善代而崇明已陷重慶遵義貴陽大震檄遂
畱視事貸銀募兵治戰守具而急遣總兵官張彥
才都司許成名黃運清監軍副使朱芹提學僉事
劉錫鉉等戍四川戰屢捷遂復遵義綏陽湄潭正
安桐梓諸州縣貴州通志

按劉時俊渝城功罪紀略言戴口口冒功云如
戴僉憲不認虛冒則遵義初復在天啟元年十
二月十六日當是時僉憲何日出都門何日會

俊於邯鄲道上何日發諭帖何人傳塘報而乃
自添銜名通報於在京在外各衙門云遵義之
復奉劉太僕戴監軍之諭帖云云據此則初復
遵義之年月更無可疑明史永寧土司傳云遵
義諸郡邑皆復時二年三月也史蓋總諸郡邑
書其最後者故不合又通鑑輯覽云川兵克重
慶貴州兵亦復遵義卽指此後載陳志之萬任
黃一清領兵事疑卽通志所書而陳志脫誤也
二年三月復重慶已而遵義再陷

朱燮元授巡撫率川卒追崇明江安新都遵義諸

郡邑皆復時二年三月也燮元以計擒樊龍殺之
張彤亦爲亂兵所殺生禽龍子及其黨三十餘人
遂復重慶時安邦彥反於貴州崇明遙倚爲聲援

明史永寧
土司傳

按復重慶時有遵義兵三千楊守備領之後遵
復破馮推官砦焉參將周之德並不知下落見
劉時俊渝城功罪紀略又考楊明吾譜序二年
七月二十三日西賊攻遵城各逃性命賊恣意
擄掠地荒人絕千里無烟乃避望草之讓水遵
義再陷卽此時

黔撫題委通判萬任參將黃一清於七月領兵復遵
擁空城駐劄綏陽招集流民

陳志

按此條陳志原係元年而又書壬戌壬戌乃二
年且元年七月遵尚未陷也姑移置此一清當
是運清貴州通志云二年二月安邦彥叛圍貴
陽時運清駐遵

義

九月增田賦時增州縣兵計畝加餉從御史馮英請
也

通鑑輯覽

三年五月四川總督朱燮元克永寧奢崇明走龍場

原注在四川敘永廳

永寧縣東南與貴州畢節縣接
界今為營考此又一龍場非王守仁所謫之龍場驛

副總兵秦衍祚再復遵義

先是川兵既克重慶貴州兵亦復遵義已而遵義再爲賊所陷提官馮鳳雛被殺朝議加燮元兵部侍郎爲四川總督討賊至是燮元謀直取永寧拔之副總兵秦衍祚等亦克遵義崇明父子勢威乃率餘眾走水西龍場借兵安邦彥邦彥遣二軍竄遵義永寧燮元敗走之諸將乘勝鑿入龍場生擒崇明妻安氏及其弟崇輝斬獲萬餘崇明父子竄深箐得免時燮元以永寧旣拔蜀中已靖遂不窮追而貴州巡撫王三善以崇明竄入水西會師進

討連破賊有輕敵心會糧盡退師爲賊躡之總兵

秦民屏參將王建中戰歿三善遂爲降賊陳其愚

所害於是賊勢復張

通鑑輯覽

三年川師復遵義進攻永寧遇奢寅於土地坎大

兵奮擊敗之進克其城諸回寨降者日至崇明勢

益威踴躍投水西邦彥與合兵分犯遵義永寧川

師敗之於芝蔴塘賊遁入青山諸將逼渭河蹙入

龍場陣獲崇明妻安氏及奢崇輝等斬獲萬計藺

州平總督朱燮元請以赤水河爲界河東龍場屬

黔河西赤水永寧屬蜀永寧設道府與遵義建武

聲勢聯絡明史永寧
土司傳

癸亥部銓道府命將侯良柱陳一龍分兵屯守遵義黔省楊述中會題川貴參將王達統兵由烏江同復遵義招集流民是年田荒民散斗米數金僵殍在道陳志

三年貴州總兵魯欽統兵自遵義直入奢賊巢穴

進營欽永廳之紅崖山四川通志

四年甲子先任本道盧安世督師復遵薛公碑

五年春三月以朱燮元總督雲貴川湖廣西軍務駐

遵義

先是貴州官軍屢爲安邦彥所敗廷議以川師不
協助宜令一人統之乃進燮元兵部尙書總五省
軍駐遵義明年賂賊黨誘殺奢寅崇明年老無能
爲邦彥亦乞撫燮元聞於朝許之未幾以父喪去

賊復熾

通鑑綱目三編

初大方東倚播北倚藺相爲犄角後播藺旣平賊
唯恃烏撒爲援而畢節爲四夷交通處當王三善
由陸廣深入以失地利而陷

明史土司傳

燮元議滇兵出霑益遏安效良應援而別布天生
橋尋甸等以絕其走蜀兵臨畢節扼其交通四裔

之路而別出龍場崖後以奪其險黔兵由普定渡
思臘河徑趨邦彥巢而陸廣鵬池擣其虛粵西出
泗城分兵策應然後率大軍由遵義鼓行而前尋
以憂去未及用

蠻司
合誌

燮元去總督閔夢得繼之亦以貴州抵大方路險
賊惟恃畢節一路外通我兵宜從永寧始而普市
而霑泥而赤水皆坦途赤水有城郭可憑而守宜
結營進逼白崖又層臺又畢節畢節至大方不及
六十里賊必併力來禦須重兵扼之斷其四走之
路然後遵義貴陽尅期進亦不果用

明史土
司傳

七年原作六丁卯奉行撤屯歸民給田領種始開徵

量報入冊

莊烈帝崇禎元年仍起朱變元五省總督討賊平之
變元至檄滇兵下烏撒蜀兵出永寧畢節扼各路
要害而親率大軍駐六廣以逼大方時崇明號大
梁王邦彥號四裔大長老其下各號元帥悉力趨
永寧先犯赤水變元授意守將許成名佯敗引之
深入度賊已抵永寧分遣林兆鼎從三岔入王國
楨從陸廣入劉養鯤從遵義入邦彥分兵四應力
不支羅乾象復以奇兵繞出其背急擊之崇明邦

彥皆被創斬其首以獻安位降賊平

合蠻詞誌

按奢安悉平通鑑輯覽書在二年八月明史土司傳亦止承元年書

是歲始徵田糧十分之二

先是奢酋陷遵民悉逃散今甫漸集報徵輸十分之二

陳志

遵義縣知縣胡崇明移建府學於府城東鳳山麓舊

學基右卽今地

詳學校門

三年庚午巡道盧安世分兵駐防鎮南沙崖吳馬口烏江等十三隘禦水西以防竊發

陳志

冬十二月增田賦畝加三

通鑑綱目三編

按楊明吾譜序萬厯時差輕而糧易納每年每兩使費無幾至盧道鎮遵每糧帶徵馬價所派科條每兩三倍里黨頭人無不充役

五年王申水西叛苗阿鳥迷率眾投誠獻渭河下水一帶地方本道盧安世納之詳請改建馬場爲懷遠衛開拓邊土後數年苗叛復據之

陳志

按王公殉難錄書此事較詳見後而云水西酋長小烏安祚遠同部酋趙國政獻渭河地授指揮增懷遠衛且在七年而志云五年未詳孰是阿鳥迷

或二箇別名也遵郡紀事亦云安祚遠等獻地設懷遠衛又云因定賦額其後復失有糧無田大爲民累語詳賦稅門而又係之十四年蓋以郭士奇等殺趙國政之年爲說非實獻地在此年也

十年調遵義兵援成都

丁丑閏十月丙寅李自成由漢中趨攻廣元總兵侯良桂戰死賊直逼成都按臣陳廷謨檄總兵羅尙文集永遵松茂之兵來援有諮良桂削職戴罪自贖廷謨降三級蓋不知良桂之死也

蜀碧

十二年正月妖人張道興結水西擾遵義防守中澤

臨官縣文啟擒斬之

詳金石錄公碑

十四年■月遵義知縣王佐聖創築治南六十里新

站城以扼水西五旬而工完

採王公殉難錄詳宦績傳

八月逆酋郭士奇吳上才殺趙國政於府城小十字

街

採王公殉難錄詳見次年

十五年四月逆酋吳上賢等寇遵義破城劫獄知縣王佐聖遇害明日佐聖所練鄉兵皆至遂平之

先是崇禎七年水西酋長小烏安祚遠同部酋趙國政投獻渭河一帶地方朝廷嘉其慕義爲增設懷遠衛授以指揮小烏旣死地復失於水西國政

無所歸耕屯於沙溪而恃彊蠶食邊夷遂與其酋
郭士奇吳上才等結怨十四年八月十七夜士奇
等覘國政入府伏兵胡啟富家襲殺國政于小十
字街鸞割之以眾抄沙溪捲其家口貲畜盤踞深
山稱戈拒命政父張安弟國泰及部將王加禮等
竄入水西糾安祚新聲言鎮道府縣授意殺降借
兵復仇思搖蕩邊疆佐聖移書祚新推誠慰夷情
杖義責叛黨士奇等亦憚佐聖威名送還所擄國
政家口三百餘張安等乃安心受撫祚新亦息其
邪謀佐聖旋率丁壯躬出險隘斬馘千計得逆酋

上才士奇等置府獄奪還陷賊男婦唐貴韓現戴
楊倫等數百人佐聖請立決元兇以散餘黨條上
守禦十策皆沮不行而鎮府文武方畏賊市恩托
常照磨設宴獄中疎其械捫款密異常細作出入
無詰由是其黨謝登甲結連外寇龍正國吳上賢
私刻符印號召諸酋日謀劫獄潛運籐甲皮盔火
藥器械藏城中十五年四月初一日皆大舉入寇
會於上村佐聖所分汎鄉勇頭目王選王之琴冉
國柱等禦之不敵皆戰沒於宣峰埕賊長驅犯城
總兵李茂先偵知擁兵自脫知府常三錫指揮袁

蕙芳或稱請救或稱把隘一時星散佐聖獨守孤城挺身誓眾環甲巡禦堅持兩晝夜外援無一至者初四日王更賊從北門山背掘城燒屋以入佐聖命服公堂揮劍格鬪面受三刀身被數創裂眚罵賊而絕詰旦新站城鄉勇頭目王尙明等統領永安平水十里土司捲甲赴援中途聞變哭聲振野白旗滿山直搗寇營復分兵新站以絕其歸路殲上賢正國并賊黨數千人於境內士奇窮感自經斬其首生擒上才登甲寸磔之以祭佐聖水西彝酋皆求款附遵城以安皆不出佐聖生前成算

五月遵人建祠於宣峰墪祀佐聖以選之琴國柱

配食

王公殉難錄

里民郭士奇吳尙才緣水西降將趙國政占田橫
虐之害糾眾撲殺於東門內小巷士奇等繫獄未
決逆謀聚兵潛匿城內劫獄戍官而出知府常三
錫率鄉勇擒斬之反側悉安

陳志

按此條陳志屬之十二年辛巳今據殉難錄考
之則是十四十五兩年事故置此錄乃佐聖子
恪目擊其事所呈知較

為確也

盧安世以鄭益顯權守底水臨招撫流移團練鄉

兵遵義西境隱然長城在臨十年招安祚遠來獻
渭河西岸地二百里崇禎十一年祚遠地復歸水
西道府以懷遠指揮地雖失然降人難便裁去因
遣國政耕屯沙溪視流官折俸沙溪豪猾郭缺器
械俱運藏城中計四月初二日諸臨官士司往尙
明家作生日必不及援救遂於初一日傍晚潛從
上村攻城諸司臨聞急各歸集所部會救逮至魯
生已死難諸賊聞救至上才士奇從小坎登甲等
從大銀山正國等從十二茅坡各覓路歸沙溪顯
馳至馬坎顧從者曰彼聞援至必走走必不由此

急趨小坎邀之生擒上才士奇縱馬走驍追大馬

桑蒿士奇已縊死

孔昭民撰鄉
孟顯行略

按安會獻地陳志在崇禎五年殉難錄在七年
考刁化神撰聶公平妖碑安世置臨官在天啟
四年此云孟顯在臨十年招祚遠獻地由四年
置臨推之則獻地定在崇禎七年與王恪原呈
皆實錄也此行略殘稿中間有文缺處其言祚
遠獻地及遵義破復始末較他史傳爲詳以稿
最後得不及改前獻地當繫在崇禎七年下崇
禎十一年當補渭河一帶地復歸水西懷遠指

揮趙國政耕屯沙溪視流官折俸一條以後事
始有張本

遵義府志卷四十